



Sarajevo, 25. februar 2026.
MEDIJIMA

SAOPĆENJE ZA MEDIJE
Održan deveti sastanak Pododbora za pravdu, slobodu i sigurnost

Reforma pravosuđa i rad na predmetima ratnih zločina, borba protiv korupcije, sloboda izražavanja, borba protiv organizovanog kriminala, borba protiv terorizma i sprječavanje nasilnog ekstremizma, upravljanje granicom, azil, migracije i vize bile su teme devetog sastanka Pododbora za pravdu, slobodu i sigurnost između Evropske unije i Bosne i Hercegovine, koji je održan u utorak i srijedu, 24. i 25. februara 2026. godine, u Sarajevu.

Sastankom je sa strane BiH kopredsjedavao Bakir Dautbašić iz Ministarstva sigurnosti BiH, a sa strane EU Barbara Jesus-Gimeno iz Opće uprave Evropske komisije za proširenje i Istočno susjedstvo.

Evropska komisija je ocijenila kako u oblasti pravosuđa nije bilo napretka, te kako je potrebno uhvatiti momentum za provođenje reformi u ovoj oblasti. Ključni prioriteti u ovoj oblasti su usvajanje novog zakona o VSTV-u i zakona o sudovima BiH u skladu s evropskim standardima i preporukama Venecijanske komisije. Istaknuto je kako Evropska komisija očekuje usvajanje ova dva zakona, a kako bi Vijeću mogla predložiti usvajanje pregovaračkog okvira sa BiH. Među prioritetima u oblasti pravosuđa su i usvajanje nove strategije reforme sektora pravosuđa, uvođenje presuda MKSJ-a i njegovih pravnih nasljednika u domaće krivične evidencije, efikasno provođenje državne strategije za procesuiranje predmeta ratnih zločina, te imenovanje sudija Ustavnog suda na upražnjene pozicije i poštovanje njegovih odluka.

U oblasti borbe protiv korupcije nije bilo napretka, a Evropska komisija je istaknula kako je potrebno finalizirati zakonodavni i institucionalni okvir u ovoj oblasti, te osigurati profesionalizaciju tijela za sprječavanje korupcije u cijeloj zemlji. Potrebno je, također, kompletirati zakonski okvir vezan za zaštitu prijavitelja korupcije. Od bh. vlasti se očekuje da pokažu rezultate u oblasti proaktivnih istraga, krivičnog gonjenja i izricanja osuđujućih presuda u području korupcije na visokom nivou.

U dijelu koji se odnosi na garanciju slobode izražavanja, medija i zaštite novinara nije bilo napretka, te Evropska komisija od bh. vlasti očekuje da osiguraju dekriminalizaciju klevete. Razmijenjene su informacije vezano za reformu javnog RTV sistema, uključujući finansijsku održivost, te je Evropska komisija pozvala bh. vlasti da poduzmu brze mjere na rješavanju ovog pitanja.

Potrebno je poboljšati okvir za temeljna prava kao i njegovo provođenje. U tom smislu od bh. vlasti se, među ostalim, očekuje usklađivanje pravnog i političkog okvira za zaštitu prava djece sa pravnom stečevinom EU, poboljšanje pravnog i institucionalnog okvira za zaštitu manjina, te ravnopravnosti spolova. Razmijenjene su informacije vezano za aktivnosti bh. vlasti na

provođenju presude Evropskog suda za ljudska prava u predmetu Sejdić–Finci, te provođenju izmjena Zakona o instituciji Ombudsmena za ljudska prava BiH u dijelu koji se odnosi na preventivni mehanizam za sprječavanje mučenja i zlostavljanja.

Evropska komisija je pozdravila usvajanje Strategije Vijeća ministara BiH za stvaranje poticajnog okruženja za razvoj civilnog društva 2025–2029. Od bh. vlasti se očekuje poštivanje slobode okupljanja i udruživanja te uzdržavanje od postupaka koji bi mogli negativno uticati na ostvarivanje ovih sloboda. Potrebno je državni Zakon o slobodi pristupa informacijama u potpunosti uskladiti s međunarodnim standardima o nezavisnosti žalbenog postupka.

U borbi protiv organiziranog kriminala ostvaren je određeni napredak, posebno usvajanjem Zakona o zaštiti ličnih podataka, Strategije i akcionog plana za kontrolu malog i lakog naoružanja, Strategije za suprotstavljanje trgovini ljudima i pratećeg akcionog plana, te operativnim akcijama organa za provedbu zakona uz podršku Europolu. Evropska komisija je pozdravila osnivanje koordinacionog tijela za sprječavanje pranja novca i finansiranja terorističkih aktivnosti te usvajanje Procjene prijetnje od organiziranog kriminala u BiH.

Od bh. vlasti se, među ostalim, očekuje uspostavljanje specijalizovanih međuinstitucionalnih istražnih timova za složene predmete, kontaktne tačke za vatreno oružje, uspostavljanje registra stvarnih vlasnika te kapaciteta za upravljanje imovinskom koristi ostvarenom krivičnim djelima na državnom nivou.

Evropska komisija je pozdravila usvajanje Zakona o graničnoj kontroli te potpisivanje Sporazuma o statusu Frontexa. Od bh. vlasti očekuje se preuzimanje upravljanja privremenim prihvatnim centrima te daljnje usklađivanje vizne politike BiH s *acquisem* EU.

Direkcija za evropske integracije